

կերպ՝ Դավրիժեցին հիշատակում է նաև մի նամակ, որը Մելքիսեթ կաթողիկոսն է խնդրում Ամիրգունա խանին գրել Շահ-Աբասին. «ի խանէն ևս խնդրեաց Մելքիսեթ կաթողիկոսն, գրել **խնդրանաց թուղթ** առ շահն» (էջ 200): Մեկ այլ նամակ էլ Ամիրգունա խանը այդ նամակին զուգահեռ գրում է իր որդուն՝ Թահմազդուլի խանին (էջ 202), բայց ուշարժանն այն է, որ դրա մասին Դավրիժեցին հիշատակելով՝ մեջբերում է ոչ թե անմիջապես, այլ հաջորդ՝ «Պատմութիւն կաթողիկոսութեան և փախստեան Սահակ կաթողիկոսին» վերնագրով ԺԹ գլխում, և դա արդարացվում է նրանով, որ եթե այդ երկրորդ նամակի պարզապես հիշատակությունն էր կարևոր նախորդ՝ «Յաղագս հարիւր թուման մուղաղային, զոր շահն եդ ի վերայ Մելքիսեթ կաթողիկոսին» վերնագրով ԺԸ գլխում պատկերված իրադարձությունների համապատկերին, իսկ բուն բովանդակությունն այնքան էլ կարևոր չէր, ապա հաջորդ գլխում այդ նամակի բովանդակությունն է կարևորվում, քանզի լույս է սփռում իրադարձությունների հոսքի վրա: Սա շատ նուրբ հնարանք է, որ առաջին հայացքից կարող է և չնկատվել: Նշենք միայն, որ բերված է շատ փոքր մի հատված Ամիրգունա խանի՝ իր որդի Թահմազդուլի խանին ուղղված նամակից, բայց դա միանգամայն բավական է շարադրված դեպքերի ընթացքի տրամաբանությունն ըմբռնելու համար:

Դավրիժեցու պատմագրքում առկա են թղթային միավորներ, որոնք ոչ թե ուղղակիորեն են ներբերվում, այլ անուղղակիորեն պատմվում է դրանց բովանդակությունը: Շատ նամակներ հիշատակվում են մեկ տողով, սակայն դա սովորաբար այնպիսի տող է, որ պարագրկում է նամակի ամբողջ բովանդակությունը: Նույնն է պարագան նաև մի քանի տողով հիշատակվող նամակներում: Այդպես, Դավրիժեցին մի քանի նախադասությամբ ներկայացրել է Մելքիսեթ կաթողիկոսի՝ Պողոս վարդապետին ուղղված բազմաթիվ նամակների, պատմիչի տարազմամբ՝ **«բանս սպառնականս**